

DIE SA Savanna

OORSPRONG VAN DIE RAS

Die ontwikkeling van die wit Savannabok het in 1955 begin, op die plaas van Mure, DSU Cilliers en Seuns, in 'n min sorg gebied langs die Vaalrivier waar temperature en reënval baie varieer en daar van die bokke verwag is om aan te pas, te oorleef en aan te teel op tipiese savannaveld. Plaaslike veelkleurige flapoor bokkooie en 'n groot wit bokram was gebruik as basiskudde. Die resultaat was 'n vrugbare, hitte, parasiet- en droogte verdraagsame bok met goeie vleiseienskappe. Groei in die belangstelling van die Savannabok het gelei tot die erkenning van die bok as 'n eiesoortige ras. Die Savanna Boktelersgenootskap is in 1993 gestig.



'n Trop teelooie van
Mnr. Cilliers op Olierivier



Mnr. Lubbe Cilliers en
Dr. Quentin Campbell

ALGEMENE BESKRYWING

'n Medium tot groot wit flapoor bok met 'n dik beweeglike vel en 'n kort gladde haarkleed. Ten spyte van die wit kleur, is die Savannabok baie goed gepigmenteer en alle haarlose areas is swart tot bruin gekleur.

EIENSKAPPE:

- Vrugbaar met goeie moedereienskappe. Ooie lam op die veld en bind goed met hul lammers.
- Meervoudige geboortes.
- Goeie groei vanaf die veld.
- Gebalanseerde karkas met min vet en sagte smaaklike vleis.
- Baie doeltreffende kossoekers, wei goed, benut grasse en beheer bos en onkruid baie effektief.
- Goed gepigmenteer.
- Parasiet bestand / verdraagsaam
- Hitte tolerant
- Gelykmatige temperament maklike sorg met maksimum wins.

DIE S.A. SAVANNA RASSTANDAARDE

ALGEMEEN

Die Savanna bok moet 'n sterk lewenskragtige funksioneel doeltreffende bok wees met 'n wakker maar nie wilde houding nie.

Die ooie moet van matige grote wees en fyn en vroulik vertoon. Ooie met lammers wat suip moet beskermend teenoor hulle lammers wees en moet hulle aggressief teen honde en ander roofdiere verdedig.

Ramme moet manlik, trots, robuust en gespierd vertoon.

Die Savanna bok is onder ongunstige toestande ontwikkel en moet ongunstige toestande soos hitte, intense sonskyn, koue en reën gemaklik verduur.

Die ras beweeg gemaklik en kan indien nodig lang afstande aflê opsoek na kos en water.

Die Savanna bok moet ook 'n wye spektrum van plante soos bome, bosse, struik, gras en bossies wat hard en selfs vir ander diere onsmaklik is, kan benut.

Dié bok moet 'n lang teelsoesoen hê en enige tyd van die jaar geslagsaktief wees en lammers produseer.

KENMERKENDE RAS EIENSKAPPE

- * Lewendige voorkoms
- * Simmetriese bouvorm; nie té kort of té lank van lyf of bene nie.
- * Dik, beweeglike donker gepigmenteerde los vel.
- * Kort kempagtige withaar bedekking. Gedurende die winter ontwikkel die bok ekstra donshare om hom of haar te beskerm.
- * Die bokke het sterk kake en goed ontwikkelde tande met 'n lang lewensduur.
- * Goeie moedereienskappe en hoë vrugbaarheid.
- * Lang produktiewe leeftyd.

KOP

Die Savanna het 'n matige lengte kop met 'n effe geboë neusdeel en die kopvorm is soos die kop van 'n grootbek geelvis. Die kop en neus moet redelik breed wees en nie spits nie.

Die bek moet sterk en betreklik breed wees met goed gespierde kake. Die bo en onderlippe moet gespierd en beweeglik wees soos dié van 'n koedoe.

Die tande van jong bokke sowel as van ouer bokke moet in die geval van ramme sowel as ooie goed op die kussing van die bokaak byt. Geen afwykings of bekfoute sal geduld word nie. Slegs by 'n volbek ram en ooi is 'n 6mm té lang onderkaak toelaatbaar.

Die oë moet lewendig wees, omring met swart gepigmenteerde ooglede en vel en deur goed ontwikkelde oogbanke beskerm wees.

Die ore moet matig groot wees en afhang langs die kop en netjies en ovaal gevorm wees. Die ore moet goed gepigmenteer en baie beweeglik wees sodat dit

bosluise, muggies, steekvlieë en ander parasiete maklik kan afweer.

Die horings is donker swart en groei na agter. Die horings moet stewig en ovaalvormig wees en nie teen die nek druk nie, hulle moet ook nie wild of té wyd of té lank wees nie. Ramme het sterker en swaarder horings as die ooie. By die horings se basis moet 'n redelike spasie voorkom.

Ooie sowel as ramme moet die horings laat sak en 'n dreigende houding inneem wanneer gevaar die bok of sy lammers bedreig.

NEK, VOORKWART, BENE EN KLOUE

Die nek is gespierd en redelik lank sodat die bok sy kop maklik kan optel en so hoog as moontlik takke en peule van bome kan vreet.

Die voorkwart is gespierd en van matige breedte, teen té smal of té breë voorkwarte sal sterk gediskrimineer word. Die voorbene is goed geplaas en reguit. Die pypbeen onder die knie van beide die voor en agterbene is betreklik kort maar sterk. Kootgewrigte van beide die voor en agterbene moet sterk en veerkragtig wees en moet 'n matige helling vertoon. Teen regop of slap kootgewrigte sal ook sterk gediskrimineer word.

Die kloue van beide die voor en agterbene moet sterk, hard, swart en redelik groot wees. Die twee kloutjies van elke klou moet teen mekaar wees.

Kloue moet ook nie uitgroei nie en die Savanna se kloue moet nie bars of maklik sweer of seer word nie.

Die blaaië is goed aangeheg by die voorkwarte en skof.

Die kambene en skof is ietwat hoër as die rug en kruis. By ouer ramme kom matige velplooië veral aan die voorkwart voor.

RUG EN MIDDELSTUK

Die middelstuk moet redelik lank en diep wees en die bok moet 'n goeie kapasiteit besit om ruvoer in te neem en te verteer.

Die rug en oogspiere (musculus longissimus dorsi) moet sterk en breed wees en nie reguit nie maar ook nie hol nie.

Die middelstuk moet veral by ouer diere nie silindries of ondiep wees nie. Die Savanna bok het 'n goeie sprong van ribbe en 'n ovaalvormig respiratoriese middelstuk.

AGTERKWART EN AGTERBENE

Die agterkwart moet breed wees en die agterbene moet wyd geplaas wees en regaf loop.

Die kruis moet 'n matige helling na agter soos die van 'n gemsbok vertoon. Die agterkwart moet goed gespierd en vol vleis wees.

Die hakke moet sterk, en gespierd, en die hakskeenseninge duidelik sigbaar wees. Hakke moet nie in of uit draai nie en die bok moet maklik op sy agterbene kan staan.

Die Savanna bok se stert moet regop staan en goed met hare bedek en beweeglik wees. Die kaal gedeelte moet swart gepigmenteer wees.

KLEUR, PIGMENT EN HARE

Die Savanna is geheel en al wit. 'n Beperkte hoeveelheid swart en rooi hare is aanvaarbaar, maar rooi of swart hare moet ook uitfaseer word. Pigmentasie by ramme en ooie moet donker-grys tot swart wees. Ligte vlekke moet nie by Elite ramme en ooie voorkom nie. Enige pienk is 'n prulfout.

Die Savanna is 'n geheel wit bok met 'n swart vel, horings, neuspunt, uier, geslagsorgane en kloue. Hierdie kleur kom ooreen met dié van die sogenoemde koninklike Nguni beeste.

Die bedekking bestaan uit kort wit kempagtige hare. Fyn dons vesels om die bok teen lae winter temperature te isoleer kom gedurende die koue maande dikwels voor.

TEELORGANE

Normale, goed ontwikkelde teelorgane word verlang. By die ram moet twee goed ontwikkelde testikels in een kort sak teenwoordig wees. Die skrotum van ramme moet minstens 26cm in omtrek wees, en indien daar 'n spleet is, sal 2cm die maksimum toelaatbare mate wees.

Gedraaide testes is nie aanvaarbaar nie, testes moet ewe groot vertoon.

Ooie: 'n Goedgevormde en stewige aangehegte uier met spene soos op bladsy 10 word as riglyn aanvaar en sal geldig en bindend wees totdat navorsings resultate dit bevestig of die teendeel bewys.

SPENE

Ramme: Een speen aan elke kant van die ram se sak is ideaal, en 2 aan 'n kant is voorlopig toelaatbaar tot 26 Januarie 2011.

Ooie: 2 funksionele spene is ideaal. Dubbelspene is uit, maar 1 speen met 2 gate is toelaatbaar, maar moet uitfaseer word. Spene met 'n klein blinde speentjie aan is aanvaarbaar. Sien sketse van S A Boerbok voorgehou hierby. Die maksimum spene aan 'n kant is 3, en dit behels 2 funksioneel en 1 klein en blind, OF 1 funksioneel en 2 klein en blind. **ALMAL LOS VAN MEKAAR.**

VRUGBAARHEID EN GROEIVERMOË

Die ras word gekenmerk deur sy vrugbaarheid, goeie moedereienskappe en voor- en naspeense groeiselheid.

22% tweeling kom onder ekstensiewe toestande voor en ooie moet hulle goed grootmaak. Ooie, veral stoetooie moet sonder enige hulp en toesig in die veld kan lam en hulle lammers grootmaak.

Teen te groot lammers by geboorte sal sterk gediskrimineer word.

PRULFOUTE

- * Foutiewe bekke
- * Foutiewe bene en kote
- * Foutiewe geslagsorgane en uiers
- * Enige afwyking van die normale bouvorm wat die Savanna se funksionele doeltreffendheid benadeel.
- * Onvolledige of ligte pigment

OPSOMMING

Suider Afrika met sy wisselende klimaatstoestande en ekstensiewe weidingstreke wat van Kalahari sand tot ruie bosveldstreke varieer is die wieg van die grootste verskeidenheid van pragtige wildsbokke en ook inheemse rasse ter wêreld. Hier word gedink aan die koedoe, eland, gemsbok, swartwitpens, springbok en baie ander wildsbokke. Ten opsigte van plaasdiere het pragtige beersrasse soos die Afrikaner en die Nguni hier ontstaan. Die Savanna moet ook as 'n sierlike inheemse produk van hierdie sonnige maar genadelose land met sy uiterste toestande gesien word. Natuurlike seleksie het die Savanna geskep.